

3068

NONNULLA  
DE  
VENARUM INFLAMMATIO-  
NE PRAESERTIM PHLE-  
BOTOMIAM EXCIPIENTE.

DISSERTATIO  
INAUGURALIS MEDICO - CHIRURGICA  
QUAM  
CONSENSU ATQUE AUCTORITATE AMPLISSIMI  
MEDICORUM ORDINIS

IN  
UNIVERSITATE CAESAREA LITERARUM  
DORPATENSI,

UT GRADUM  
DOCTORIS MEDICINAE  
RITE ADIPISCATUR,  
LOCO CONSUETO PUBLICE DEFENDET  
AUCTOR  
*HENRICUS GUILIELMUS MENDE.*  
RIGENSIS.

DORPATI LIVONORUM,  
TYPIS J. C. SCHUNMANNI, TYPOGRAPHI ACADEMICI.

MDCCXXVI.

*P r a e f a t i o .*

— **Imprimatur,**  
ea tamen conditione, ut simulac typis excusa fuerit  
haec dissertatio, septem exemplaria collegio, cui censu-  
ra librorum mandata est, tradantur.

Dorpati Livonor. d. 11 Mens. Septembr. MDCCXXVI.

Dr. M. E. Styx,  
h. t. Decanus.

CXXX:8

Coram benevolis Lectoribus — quibus solis  
hocce opusculum non sine quadam verecun-  
dia tradere lenique eorum judicio subjicere au-  
deo — simpliciter et ingenue profiteri, quid mi-  
hi, libello coronidem imponenti quaeque scrip-  
seram denuo perlustranti, sperandum atque op-  
tandum superesset, pluribus rationibus permotus,  
a proposito meo hand duxi alienum. Hanc ip-  
sam ob causam quilibet facile veniam mihi dabit,  
si insonti mihi id accideret, ut, prologum praefi-  
gendo; pluris quam par est tenues has plagulas  
aestimasse viderer.

Quod mihi tractandum elegi, de venarum  
inflammatione argumentum, late quidem patet,  
sed experiundo pauca tantum ex eo genere sunt  
compta, porro non liquet, quo pacto in thera-  
piae usum insigniorem converti possit, denique,  
ipsis magnae celebritatis medicis fatentibus, ma-  
ximis implicatur difficultatibus. Quare non du-  
bito, fore non nullos; qui artis salutaris alumnus,  
quem, prima de iis, quae ipse mente conceperit,  
publice disserendi occasione oblata, in tramite  
adeo lubrico et confragoso ambulante viderint,  
a periculooso itinere revocandum, imo audacem,  
dicto non parentem, graviter objurgandum cen-  
seant. Ne igitur in temeritatis crimen inciderem,  
id agendum intellexi, ut singulas solummodo ar-

gumenti, mihi propositi, partes perpendendas sumerem atque laborem meum angustioribus finibus circumscriberem, tum vero, quid eo adsequi vellere, accuratius in animo constituerem. Quaestioneū enim universam me expediturum, vel adeo novam quandam rationem et artis formulam, propriae experientiae copiis firmatam, prolaturum, nemo profecto exspectabit; consilium vero, ea quae experieendi et observandi diligentia de re quacunque, ad artem medicam pertinente, jam invenerit, singulasque acutissimorum ejus cultorum sententias, hinc deponitas, colligendi, quae necessario ex his prodeant atque, ratiocinando et concludendo, aliis rebus reperiendis inservire possint, exponendi, vel morbi cujusdam exquisitoris, recens observati, historiam, adjuncta epocrisi, describendi, ejusmodi, inquam, consilium omnino non abhorre videtur ab ea provincia, quae mihi omnibusque illis est demandata, qui, curriculi academicī perbrevi spatio emenso, dissertationem medicam publici juris facere monuntur. Veri autem investigandi et rem, de qua sermo est, diligentius examinandi studio incensus, in hac aequa ac in alia qualibet commentationis materia, desideriis, modo memoratis, me respondere posse purabam. Utique, procedente labore, in multos incidi nodos ac difficultates easque quidem haud praevisas, eoque absoluto, spem illam, qua opus suscepseram, magna ex parte infractam, non sine doloris sensu, percepi. Ut manca quaedam et imperfecta, quae offensioni mihi erant, praeteream, multa praecipue, quae perspicue ac dilucide animo, operi intento, obversarentur, postea obscurius a me exposita esse, animadverti. Naviter igitur peccata corrigere et

in melius mutare coepi: sed mox intellexi, assida industria et triplici fortasse plagularum numero opus esse, ut illa vitia omnia removeantur; in quo utroque praestando quo minus desudarem, a praesenti rerum mearum condizione impeditus sum. Hinc nihil magis mihi est exceptandum, quam ut Lector benevolus hanc commentationem tanquam operis melioris majorique cura elaborati fragmentum consideret, cui componendo nunc quidem temporis vires meae pares non sint, cum et experientia et otium me deficiant, nec sati prospero fortunae flatu utar.

Quod attinet observationes et sententias, auctoribus optime meritis debitas, quarum forte mentio hoc in libello non est injecta, excusationem petam a praesidiorum literariorum penuria, quam acerrime quidem tuli, sed cui occurrere, omni adhibita opera, hand mihi licuit. Justos rei expositae a estimatores rogo atque oro, ut, sicubi in errore me versantem invenerint, rectam mihi comiter monstrent viam neque obliviscantur, tum modo inumeros rationum ac sententiarum medicarum, sibi invicem contradicentium, scopolos caute vitari posse, si studia satis diu continuata et propria experientia, e crebro artis usu et exercitatione hausta, naviculae, luc illuc fluctibus jactatae, clavum teneant. Quodsi alia quacunque de causa Lectorum exspectationi minus satisfeci, hoc saltem pro certo affirmare possum, me omnes ingenii nervos ad hunc laborem absolvendum intendisse, quamvis animi quaedam demissio saepius vincula quasi et catenas mihi injecerit. Frontem igitur ne contrahatis, Judices, si qua sunt peccata, sed clementem pronuntiate sententiam!

cus (5), Kreysig (6), Hodgson (7), Puchelt (8), multique alii, in arte Machaonia vefsatissimi sistema venosum, quoad peculiarem ejus naturam et conditionem, totum describere conati sunt, neque profecto horum industria in universum prospero successu caruit. Tam solido autem fundamento exstructa, hujus systematis pathologia votis magis repondere poterat. Itidem, inflammationi, morborum formae, praeter febrem, frequentissimae, locum congruum inter venarum morbos adesignatum fuisse, consentaneum erat. Hoc vero sero demum evenit, uti in genere doctrina de inflammatione partium internarum humani corporis recentiori in primis memoria feliciter tractari coepit. Cel. John Hunter primus dogma gravissimum de venarum inflammatione proposuit, eoque invento, medicorum operae et experientiae latus aperiebatur investigandi campus, in quo nostro tempore experientissimi Aesculapii sectatores, quamvis non omnium desideriis satisfacerent, magna tamen cum diligentia fortunaque annuente versati sunt. Mox etiam venarum inflammatio

### C a p u t I.

Jam dudum optimo jure venatum systemati, tanquam organi parti gravissimae et cum vita animalis ratione conjunctissimae, in sede plurimum morborum investiganda, magis animum adverterunt medici, quam priori tempore, quo nimis parca observatio nimisque cupidum artis formularum studium huic rei impedimento erat. Stahl (1), Fuchs (2), Delius (3), Pohl (4), Mart-

.....

(1) Stahl, diss. de vena portae porta malorum etc. Hal.

(2) Fuchs, diss. de affectibus cum vena portae connexionem habentibus. Argent. 1718.

(3) Delius, diss. vena cava plena malorum. Erlang. 1751.

(4) Pohl, r. Menz. de varice interno, morborum quorundam causa. Lips. 1785.

(5) F. Adalb. Marcus, Entwurf einer speciellen Therapie. Nürnb. Campe, 3 Bände, 1807 — 1812.

(6) F. L. Kreysig, System der praktischen Heilkunde, Leipz. und Altenburg. 1818 u. 1819.

(7) Joseph Hodgson, von den Krankheiten der Arterien und Venen etc. aus d. Engl. übers. und mit des Dr. Kreysigs sowohl als mit eignen Anmerkungen herausgegeben von Dr. Fr. Ad. Koberwein. Hannover 1817.

(8) Das Venensystem in seinen krankhaften Verhältnissen dargestellt von Dr. Fr. Aug. Benj. Puchelt. Leipzig 1818.

saepe ceu *symptoma*, sequela vel *causa* morborum quorundam agnoscebatur, quod haud raro eorum naturae multum lucis affundebat. Notatum dignum neque satis hucusque explicatum est, cur venarum inflammationes, pro variis earum causis, plus minus diversis phaenomenis comitatae prodeant. Quam ob peculiarem conditionem distinctio hujus morbi secundum caussas subjacentes utilis et idonea videri potest. Ad hoc usque tempus venarum inflammationem prodire vidi mus :

1. *E caussis internis et universalibus.* Jos. Frank (9) statuenidum putat, inflammationem hujus generis crebro occurtere, sed saepius non discerni. Huic sententiae multa quidem favent, verum enimvero ulteriore experientiam plura patefacturam, speramus. Hoc vero certum est et exploratum, in cadaveribus, typho, delirio, tetano pluribusque aliis morbis demortuis, praeter alia phaenomena morbosa, venas plus minus inflammatas esse repertas. Casus quidam, attentione dignissimus, de venarum inflammatione, e causis universalibus orta, a cel. Rakeem (10) relatus est.

2. *Praegressa graviditate et abortu.* Hac ratione plura jam exempla vulgata sunt, Clark (11) et Wilson (12) saepe in mulieribus, febre puerperali mortuis, manifesta vestigia in-

(9) De cur, homin. caput. I. v. part. II. pag. 66.  
1807.

(10) Vid. dict. des sciences medicales. T. 41.  
1820. pag. 355.

(11) Pract. Essays on the management of pregnancy — pag. 63 — 72.

(12) Vid. Hodgson l. c. pag. 530.

flammationis in uteri venis deprehenderunt. Nec minus Chaussier (13) et Meckel (14) casus narrarunt, ubi brevi post abortum venarum inflammatio exulta erat.

3. *Varices quandoque venarum inflammationibus ansam praebere videntur.* Ribes (15) et Travers (16) plura hujus rei exempla observarunt.

4. *Singulis in casibus venarum inflammationis effecta est per conjunctionem earum immediatam cum aliis partibus morbosis, vel si ab his tactae fuerint.* Sic saepius in ulcerum, cariei, gangraenae, inflammationis erysipelatosae et cet. vicinia inflammationem venarum excoli animadversum est. Quae Fizeau (17), Ribes, Longuet (18), aliique ad hanc rem demonstrandam attulerunt exempla, sufficiunt.

5. *Quam frequentissime vero venarum inflammationis irritationem immediatam trunci venarum majorum vel minorum sequens, observata est.* Magna reperitur observationum et experimentorum copia, quae hac de re certiores nos faciat. Quid? quod statui propemodum potest, quodlibet immediatae

(13) Mémoire de la société méd. d'émul. gième année, pag. 624.

(14) V. Schwilgué, faits pour servir à l'histoire des inflammations veineuses et arterielles.

(15) V. Dict. d. sc. med. T. 41 — pag. 351.

(16) Benj. Travers, on wounds and ligatures of veins. — pag. 227.

(17) Vid. Bibliothéque médicale. T. 38. pag. 209.

(18) Diss. sur l'inflammation des veines. Par, 1815. — pag. 28.

mechanicae vel chemicae irritationis, ad trun-  
cos venarum spectantis, genus, inflammationem  
excitasse. — Huc pertinent omnes casus, ubi  
post ligaturas venarum umbilicalium vel alia-  
rum, inflammatio in iis apparebat, qua de re  
plura exempla ab Osiander (19), Meckel (20),  
Travers (21), allata legimus. Huc porro pertinet  
ea venarum inflammatio, quae, post vulnera,  
sclopetis vel tormentis inficta, et amputaciones,  
haud raro mortem adduxit, ut a Hunter, Tra-  
vers, J. F. Erdmann (22) et aliis observatum est.  
Denique praecipue in censum hic venit inflamma-  
tio venarum, phlebotomiam sequens, de  
qua hecce opusculo p[re]a aliis agemus.

Jam superioribus saeculis saepenumero ani-  
madversum est, post venae-sectionem pessima  
apparere phaenomena, imo ipsam mortem inter-  
dum consequi, cuius rei caussam veteres vel  
nervo cuidam vel tendini laeso attribuendum put-  
tarunt; vel omnino ignorarunt. Cum magna  
igitur probabilitate affirmari potest, jam anteriori  
tempore venarum inflammationem, venae sectionem  
comitantem, multorum malorum fontem,  
quamvis ignotum, fuisse, praesertim ex eo inde  
tempore, quo sententia Leonhardi Botallii, per  
quam morborum curatio novo quadam et singu-

.....

(19) Neue Denkwürdigkeiten für Aerzte und Ge-  
burtshelfer I Band, Gött. 1797 pag. 56.

(20) G. Guili. Sasse, de vasorum sanguiferorum  
inflammatione. Halae 1797, pag. 52 et 36.

(21) Dict. des sc. med. T. 41, pag. 345.

(22) Annales scholae clinicae medicae Dorpatens.  
annorum 1818, 19 et 20. Dorp. 1821, pag. 215.

lari modo mutata, a Pasquier et Casp[io] acriter  
defensa est, tali auctoritate valuit, ut venae sec-  
tio medicamenti universalis loco haberetur et  
ubique fere propagaretur. Multa veterum  
medicorum effata hac cum conjectura co[n]-  
sentient. Quapropter disciplina nostra magna  
semper cum laude celeberrimi Hunteri nomen  
memorabit, qui primus intellectus aliosque docuit,  
incommoda, quae venae-sectionem sequuntur, per-  
multis in casibus inflammationi venae vulneratae  
esse adscribenda (23). Huic ejus invento occa-  
sionem dedit observatio, qua, in examinandis ve-  
nis membrorum, a trunco resectorum, illas saepi-  
us et quidem summopere inflammatas reperiri vi-  
dit, item in equis post venae sectiones incautas  
in collo, venam jugularem inflammari percepit,  
quo facto mors adfuit. Paulo post plures  
medici Hunteri observationem propria expe-  
rientialia confirmatam sentiebant eamque cum aliis  
communicabant. Scherwen (24), Abernethy (25),  
Le Herissé (26), Hodgson, Recamier (27) et plu-  
res alii ejusmodi casus divulgabant; in libris  
quoque supra citatis plura hujus generis exempla  
reperiuntur, ut et in dissertatione quadam, quae

.....

(23) Vid. Transactions of a society for the im-  
provement of med. and. chirurg. Knowledge T. 1.  
Lond. 1793. — pag. 23. seq.

(24) Med. Commentarien etc. 4 Band. Aus d.  
Engl. Altenburg. 1778. — pag. 221.

(25) Vid. Surgical observat. pag. 147. — Uebers.  
v. Brandis. pag. 178.

(26) Vid. Corvisart. Journal de medecine, chi-  
rurgie, pharmacie etc. T. 12. Par. 1809. pag. 412.

(27) Vid. Dict. d. sc. méd. T. 41 pag. 543.

non ita pridem hic loci in publicum prodiit, auctore Adolpho Walter (28).

Semper fere venarum inflammationem post venae sectionem in brachio duntaxat diffusam animadverterunt, et, quantum eisdem scio, Hunterus solus casum quandam breviter attingit, ubi venarum inflammatio inde e loco phlebotomiae venae cuiusdam saphenae ulterior processerat (29). Ratio in eo praecipue quaerenda videtur, quod venae-sectiones multo frequentius, imo incautius in flexura articuli cubitalis quam aliis locis institui solent.

Nemo certe in dubium vocabit, inflammationem venarum in universum, cœn morbum hanc quidem rarum, sed difficillime distinguendum, qui, monente Richardo Carmichael, quam saepissime revera non distinguitur, omni attentione dignam esse. Quanto majoris autem momenti videbitur inflammatio venarum, quae venae-sectionem sequitur, cum haec primo intuitu levis operatio, quam praeterea consuetudinis gratia et quia ea tanquam remedio adversus omnes morbos explorato uti posse praesumit, plebecula in corpore suo instituendam nonnunquam manibus inertissimis commitit (\*), saepe subitanum

.....

(28) Exempla quaedam venarum inflammationis cum epictisi etc. Dorp. Liv. 1820.

(29) Vid. Sammlung auserlesener Abhandlungen zum Gebrauch praktischer Aerzte. Band 17 (1796) pag. 64.

(\*) Non possum quin hic exemplum de abuso phlebotomiae paene inaudito afferam, cui adesse mihi ipsi nuper occasio oblatâ est, et quod ob exitum singularem haud praetermittendum videtur. Rusticus

eumque inevitabilem vitae finem adducat. Quoties jam haec ipsa venarum inflammatio cum viata aegrotantis dispendio non omnino, vel nimis sero saltem cognita et distincta est! Quid? quod et ubi initio et satis mature, ut de sanatione desperari non posset, singuli casus dubitationem non admittebant, quin inflammatio venarum incommoda, post phlebotomiam apparentia, efficerit, methodum tamen vel maxime rationalem peritissimi medici sine prospero successu adhibuerunt, neque morti praedam eripere poterant. Pauca admodum sunt exempla, quibus consteat, venarum inflammationem, e phlebotomia ortam, si tantum paulo latius diffusa esset, sanatam fuisse. Cujus rei caussa, ni fallor, praeter majus vitæ periculum, quod morbus per se minatur, in eo praecipue est quaerenda, quod hucusque certa nondum inventa est ejusdem diagnosis et quod curandi ratio, quam ad hunc usque diem iniverunt medici,

.....  
quidam habitu corporis satis integro ac sano, aetate media eaque florentissima, ebrietati vero deditus, ebrius in vehementem cum sodalibus concrationem delatus est, qua magnopere bilis ei commovebatur et plagis haud mediocribus afficiebatur. Confestim valde aegrum se sentiebat; accusabat capitii dolorem, anorexiā, languorem in universum etc., mox etiam febres cum delirio apparebant. Tribus diebus exactis, cum morbus fortiter inervisset, insultibus convulsivis corripiebatur, qui mox epilepsiae plane exultaæ characterem referebant; morbi paroxysmi jamjam fortiores et quam citissime alius alium insequentes redibant, ita quidem, ut aegroto cum 28 intra horas 24 colluctandum esset. Cum malum per tres dies haud remitteret et jam patientis constitutionem invasisse vide-

morro, si paulo latius se diffuderit, devincendo non sufficit. Haec duo momenta praecipue ei respicienda sunt, qui ad hunc morbum meliori fortuna sanandum se accingat. Liceat nunc mihi ea, quae imprimis hac ratione de argumeto nostro, aliorum experientia ductus, sentiam, duobus capitibus proxime sequentibus Lectorum humanissimorum indulgenti iudicio submittere.

.....

retur, uxor ejus tonsorem quandam arcessivit, qui ea in regione magnam sibi scientiae medicae famam conciliaverat. Hic statim 3 venae sectiones in ambobus brachiis et uno pede instituit, easque, 6 fere horis elapsis, repetendas curavit. Aegrotus, quamquam inquietus, aliquanto post per multas horas dormiebat; insultus epileptici nunc cessabant, sed aegrotus e vestigio in summum incurrit maniae gradum. Dies 2 serius, cum jam universalis virium languor appareret; denuo ter vena ei aperiebatur; ita ut in universum 8 fere sanguinis librae ei essent detractae. Quid tandem? Post brevem convalescentiam, aegrotus perfecte erat sanatus! —

.....

## C a p u t II.

**L**ongius prolaberemur ac fini, nobis proposito; male responderemus, si phaenomena venarum inflammationis hoc loco in universum persequi in animo haberemus; neque etiam horum cognitio sola omnino sufficit ad inflammationem venarum rite distinguendam, ubi e venarum irritatione, phlebotomia excitata, oriebatur. Hic tantum peculiaria phaenomena sunt consideranda, quae, praeter signa generalia inflammationis vasorum, demonstrant, in casu quocunque incommodas phlebotomiae alicuius sequelas vulneratae venae esse attribuendas. Secundum observationes hucusque notas, conjicere licet, inflammationem venae, in phlebotomia laesae, initium capere:

1. Si parvum venae-sectionis vulnus non sati cito coalescere, margines ejus a se invicem recedere, tumescere, rubentes ac dolentes fieri videmus, quo facto etiam haud raro paulo post sanguis decolor, pins vel ichor e vulnere scaturit. Omnes propemodum observations obviae probare videntur, sub hac rerum conditione haec plane vulgaria esse phaenomena, iisque sine dubio magis atque maturius animus foret advertendus,

quoniam eo malum, sensim se excolens, jam commodo forsan tempore distingui et, quo minus ulterius diffundatur, impediri poterit.

2. Si uno vel duobus diebus post institutam venae-sectionem tumor paullum tensivus, inflammabilis, vulnus incisum circumseendet; praesertim vero si tumor magis supra vel infra locum incisum versus venae decursum trahitur.

3. Si cum tumore, qui interdum etiam haud insigniter excolitur, simul dolor conjunctus est, enndem locum occupans atque simili modo cursum trunci venarum sequens. Hic dolor saepe jam maturius, quandoque statim horis aliquot post operationem incipit, et initio communiter sensu quodam urente percipitur, sensim vero augetur ac latius propagatur. Idem regio, ubi dolor et tumor sedem figunt, plus minus calida appetat.

4. Si motio membra, in quo venae-sectio instituta fuit, difficilior redditur ejusque languor quidam animadvertisitur,

5. Si symptomata generalia, quae, praeter localia, modo memorata, vasorum inflammationem universim indicare videntur, prodeunt. Huc in primis pertinent: febris, pulsus frequens, parvus, inquietudo, anxietas, languor et cet. Inter ea talibus phaenomenis apparentibus, venarum inflammatione plerumque longius jam progressa atque adeo in universum facilior cognitu, sanatu difficilior est. Saepe vero et symptomata illa allata cum iis convenient, quae venae-sectionem necessariam renderent, qua re diagnosis haud parum turbatur.

6. Denique, ut inflammatio venarum, propter venae-sectionem orta, mature discernatur,

praecipue adhuc causae forte obviae, tum localis, tum universales, respiciendae sunt.

Quodsi venarum inflammatio, post venae-sectionem apparet, latius jam fuerit diffusa, si in venas altius sitas jam transierit, morbi symptomata generalia jam praevalere incipiunt; dolor vehemens localis, ut et tensio ac tumor, versus diem sextum, quandoque et serius, penitus evanescunt; vulnus, venae-sectione inflictum, si quoque prius apertum erat, clauditur, saepe etiam membra laesa pristinam mobilitatem recuperant. (30) His sub conditionibus jam inflammatio ulterius ad cor usque processit, in struncis vero venosis membrum patientis remisit atque hic vel in suppurationem vel exsudationem transiit, quod posterius multo saepius contingere solet. Priori casu vena vel prorsus suppurata ac destructa est, vel singulos format abscessus, ad venae cursum perperuo directos, uti Hunterius observavit. Posteriori casu sanguinis fibra in finitimam telam cellularem exsudata esse potest, (ubi saepe tumor fluctuans oritur, fluido puriformi repletus, qui saepe venam morbosam cingit,) vel in membranarum substantiam, quod insignem harum duritatem, crassitudinem ac rigiditatem efficit, vel denique in ipsum venae cayum, quo facto haec concrecscit, aut fibra sanguinis exsudata obstruitur.

Quodsi hoc modo phaenomena localia inflammationis venarum, latius diffusae, magis magisque oculis subtrahuntur, tum passio universalis eo periculosius mali progressum declarat.

(30) Vid. Hodgson l. c. pag. 527. Puschelt l. c. et cet. ut et historiam morbi huic libello adjunctam.

Febris rapide augescit, pulsus fit frequentior, minor, quin debilior; quandoque universalis virium defectio, defatigatio et horripilatio apparent; simul magna inquietudo, anxietas et impedita respiratio; lingua multum obducitur; accedunt ructus ac nausea, neque raro his cum phae-nomenis pressio in praecordiis et cordis palpitatione consociantur. Saepe convulsiones adsumt, ut et symptomata, tetanus referentia: nonnulli tamen observasse affirmant, posteriores magis initio morbi praesto esse ac statim remittere, si inflammatio in maiores et altiores venarum truncos se diffuderet. (\*) Porro sensorium commune crebro mirum in modum afficitur dolorque vehe-mens nervosus tum in stuporem et delirium abit. Tandem vero in universum ejusmodi conspicuntur symptomata, quae in typho apparentibus valde sint similia, inter quae conimuniter mors con-sequitur. Cel. Langenbeck (31) haec typhosa phaenomena, ab iis, quae verum typhum indicant, eo distingui affirmat, quod nulla symptomata auctae systematis arterialis actionis sint praegressa; saepè tamen initium morbi, ubi inflammatio in vénis magis superficialibus obvia est, febris inflammatorye symptomatibus comitatum videmus. Multis modis haec phaenomena nervosa, notatu dignissima et constantia, explicare tentarunt, sed nondum res ad liquidum est per-

(\*) Historiae morborum, pag. 29 et in fine hujus opusculi allatae, hanc sententiam quoque confirmare videntur.

(31) Nosologie und Therapie der chirurg. Krankheiten u. s. w. oder gesammte ausführl. Chirurgie für pr. Aerzte und Wundärzte. 1 Band. Götting. 1822 pag. 610 seq.

ducta. Hunter (32) et Hodgson (33) ejus rationem in eo quaerunt, quod pus in venas effundatur ac sanguini admisceatur. — Contra Cel. Kreysig (34), ita tamen ut non satisfaciat, monet, pus saepe omnino una cum sanguine circulari, si ex abscessibus sugitur et aliis locis deponitur, neque tamen ejusmodi symptomata producere, materias etiam alienas, in venas sparsas, anxietatem quidem, circulationis turbationem et cet., minime vero typhi symptomata efficere. Veruntamen, me judice, haec argumenta, modo memorata sententiam falsam esse, haud sufficien-ter probant, quamvis aliquatenus dubiani eam reddant. Primo enim pus ex abscessu certe alias est naturae, quam illud, quod in venarum mem-brana interna secernitur. Ne satis quidem explora-tum est, annon pus sic dictum, quod in venis reperiebatur, potius sit lympha coagulabilis, at-que hucusque quaestioni, a Puchelt propositae: num forsan lympha coagulabilis eo ipso a pure distinguenda sit, quod a membranis secernatur, cum illud in organorum parenchymate formetur, neutquam negando responsum est; multa vero huic opinioni favent. In universum, ni fallor, pus, inflammatione venarum in his secretum, tanquam secretum quoddam morbosum, a mem-branis, sanguinem venarum continentibus, pro-ductum, propiore necessitudine cum sanguine ve-narum conjunctum esse oportet. — Venae, in-quit cel. Puchelt, non sunt tubi lignei, plumbei,

(32) Vid. Medicinische Commentarien I. c.

(33) I. c. pag. 531.

(34) Hodgson; v. d. Krankheiten d. Art. und Venen, pag. 533 v. Not.

emortui, sed ē membranis, ratione organica animatis, consistunt, et in vitalitatem sanguinis, in iis manantis, ut et in ejus motum magnam exserunt vim. Quodsi membranae venarum ita morbo sunt correptae, ut pus secernere possint, sanguinem quoque in eis aegrotare necesse est; id jamjam confirmat degeneratio et stagnatio venosi sanguinis in venarum parietibus inflammatis et induratis; — sanguinis, vero circulatio in hac venae parte eo impeditur; pus secretum cum sanguine melius potest commisceri, sanguis venarum igitur, quoad mixtionem chemicam, morbose mutatus, necessario etiam in alias actiones ac partes organismi, systemati venoso consensuali nexu junctis, cum detimento reaget; et hoc modo omnino, si pus venoso sanguini admisceatur, typhosa quoque phaenomena oriri posse videntur.

Neque argumentum secundum, a cel. Kreyzig contra dictam sententiam allatum, hujus veritati prorsus renititur. Etenim nimium erroris periculum subiret is, qui vim materiarum alienarum, in organismum humanum exseri solitam, in eam transferendam putaret, quae a materiis, in ipso organismo progeneratis, exseritur; praeterea substantiae alienae communiter in vēnas sanas sparguntur, cum sanguini non sint analogiae, eidem chemice admisceri non possunt et celeriter ad organon centrale, cor puta, rapiuntur, atque hinc fortasse vehementer sensorii communis et animi affectiones derivandae essent. Ex quibus omnibus efficitur, in argumentis contrariis, modo allatis, multa adhuc desiderari; nihilo minus tamen et illa Hodgsonis sententia argumentis sufficientibus caret, ideoque phaenomena typhosa in

inflammatione truncorum venosorum latius diffusa, meliori adhucdum explicazione indigent.

Cel. Puchelt (35) novam plane explicandi rationem proposit. Caussam principalem, cur venarum inflammatio sit letalis, in inflammatione, versus centrum systematis vasorum se diffundente, cum inde sequente irritatione dynamica cordis ac systematis arterialis, positam esse conjicit. Ubi vero venositas praevalens versus centrum praecipue porrigitur, ibi semper mutationes morbosas sensorii communis et animi, nervorum motoriorum ac somni prodire, statuit, cum e contrario functiones cerebrales et sensus, ex iis pendentes, tum quam maxime afficiantur, si aucta venarum vita iuprimis versus peripheriam agendo tendit. Negari omnino nequit, functiones illas, modo memoratas, in phlebitide latius diffusa plerunque plus vel minus morbose affectas apparere, item in truncorum venosorum majorum et cordis inflammatione caput communiter, imo quandoque ad ipsum usque mortis momentum, insigniter liberum manere. Sed, quamvis illa observatio sit acutissima, turbationes tamen sensorii communis, animi, nervorum motoriorum et somni non sunt sola, imo interdum ne eminentiora quidem in truncorum venosorum inflammatione phaenomena. Quomodo igitur reliquae functionis cerebralis affectiones, e. g. capitis dolor nervosus, stupor et deliria, sunt explicantae, quas Kreyzig aliisque in venarum inflammatione latius diffusa observarunt?

Nonne vero forsitan phaenomenorum typhosorum, in truncorum venosorum inflammatione ob-

(35) l. c. pag. 232 seq.

viorum, ratio faciliorem explicationem admittet, si caussae symptomatum characteristicorum in vero typho exactius considerarentur? Typhum altiorem tantum gradum febris astheniae existimandum putaverim, atque talibus quidem cum phaenomenis peculiaribus conjunctum, quae abnormem humorum, in primis vero sanguinis, conditionem demonstrant queaque duntaxat pro consequentiis secundariis morbi cuiusdam partium solidarum, i. e. systematis vasorum et organorum secretionis sint habenda. Primo loco igitur in typho semper sistema vasorum, vel ejusmodi organa, quorum ope sanguis praeparatur ac miscetur, morbose afficiantur necesse est, qua re sanguis, quoad mixtionem et motum vitalem, simul morbose mutatur. Cum vero hic morbus partium solidarum in energia actionis imminuta positus sit, consentaneum est, ut similis abnormalitas in sanguinem transeat; nam vasorum parietes tanquam externa, sed animata sanguinis involucra sunt consideranda, quocum, quod vitalem actionem attinet, firmo vinculo consociati sint. Tandem vero etiam sanguis illam vi vitali destitutam conditionem induet, quam in typho obviam deprehendimus. In phaenomenis autem typhosis, inflammationem venarum comitantibus, omnino simile quoddam animadvertisimus. Notissimum enim est, morbos venosos characterem astheniae praese ferre; quanto magis eam inflammationem cum suis sequelis, quae majores venarum truncos (ubi quod venositati est proprium et peculiare manifesto prodit), occupet, atque proinde systema venosum immediate invadat, characterem asthenicum adoptare et sic etiam vim vitalem, in eo contentam, extenuare oportet? Sanguis hoc mo-

do, quoad mixtionem et vitam, morbosus, tum in circulationem recipitur omniaque illa efficit symptomata, quae in febre putrida ab humorum dissolutione oriuntur.

Ad certam in venarum inflammatione, inaspicatam venae-sectionem excipiente, diagnosis consequendam, maximi porro est momenti, ut haec morbi forma ab aliis plus minus ei similibus rite distinguitur, eo magis, cum in hoc tam periculo malo hominemque cito necante, curando, permutatio cum aliis morbis magnis facile erroribus et incuriae peccatis, serius haud emendandis, ansam praebeat. Quare haec venarum inflammatio distinguedenda est:

1. Ab inflammatione arteriae cujuscunque, in eadem regione sitae. Hic lucem afferre debet observatio, quo dolor convertatur. Febris etiam in arteriarum inflammatione multo magis est acuta; porro haec versus ramos earum magis dirigitur et propagatur.

2. Ab inflammatione vasorum lymphaticorum vicinorum venarum inflammatio eo differt, quod in illa, malo ulterius procedente, dolor semper ad sinistrum pectoris latus trahitur (36); observatum quoque esse perhibetur, vasis lymphaticis inflammati, in cute 2 vel 3 lineas, laete rubras, cursu parallelo juxta se invicem decurrentes, conspici; hoc casu denique glandulae lymphaticae vicinae semper tumentes ac dolentes apparent. (37)

.....

(36) V. Dict. d. sc. méd. T. 41 pag. 358.

(37) Conf. L. A. Struve, commentationem de phlegmasia alba dolente. Tübingae 1825 pag. 21 seq. et al. loc.

3. Per magni etiam refert, ut inflammatio venarum, a phlebotomia orta, ab inflammatione cutis erysipelatosa, in propinquu circa venae sectionis vulnus apparente, quae saepius post phlebotomias in hominibus rheumaticis et arthriticis, sensibili admodum cute praeditis, similia sistit symptomata, recte discernatur. Signa distinctiva et characteristica hujus inflammationis erysipelatoae sequentia sunt: tumor haud in altum adtollitur, sed planior est et communiter etiam ad latus magis est diffusus, quam in venarum inflammatione; rubor minus fuscus ac tumor non sunt circumscripsi, sed sensiti versus marginem evanescunt; calor et dolor plerumque etiam non tam sunt vehementes, posterior potius sensu quodam pruriente ac titillante continetur. Neque minus etiam affectionis universalis ratio in erysipelate, ut et mora ejusdem ac decursus hunc morbum satis manifesto a venarum inflammatione distinguit; plerumque jam patitis diebus post quam prodierat, evanescit, cum in venarum inflammatione tum demum phaenomena, supra allata, majori gradu apparent.

4. Fortuita vulneratio tendinis cuiusdam, venae-sectione adducta, experientia magistra, symptomata similia animumque agitantia efficere potest, quae causa Bellum aliosque commovebat, ut sequelas periculosas inauspicatae venae-sectionis semper ejusmodi laesioni attribuerent. Ne quis hic in errorem noxiun delabatur, commodum erit observare, aegrotum, tendine laeso, statim in ipso, quo scalpellum infigitur, momento, vehementissimum dolorem percipere, qui tum continuo perdurans, non, ut in venarum inflammatione, magis in directione membra longi-

tudinali progreditur, et in primis, motu minimo musculorum excitatus, insigniter augetur. Porro, tendinibus laesis, multo maturius et vehementius symptomata, ut: deliria in loquendo, spasmī, convulsiones, trismus, tetanus et cet. apparitura essent, quam in venarum inflammatione, uti jam in aliis tendinum et vaginalium tendinosarum vulnerationibus semper fere observatum est. Perpendendum denique est, in vulneratione tendinis, e venae-sectione orta, venam transfixam esse oportere, quia tendo utique ei subjacet; tum vero simul semper, ni fallor, sanguinis suffusio locum habebit.

5. Cum in phlebotomia nervus laesus fuerit et similia atque in venarum inflammatione phaenomena se exhibuerint, ad diagnosin rite formandam respiciendum esse ajunt, dolorem quidem etiam paullum supra scalPELLi punctionem extendi, praecipue vero infra eandem eoque loco, ubi rami obvii sunt. Porro dolor statim post venae-sectionem sentitur, tum omnino vehementissimus est et haud raro paullo post immunitur. Quodsi post talem laesionem nervorum inflatione supervenit, motus febriles, spasmī, convulsiones aliaque symptomata, quae etiam in venarum inflammatione occurunt, cito quidem excolluntur; tum vero notae distinctivæ loco habendum est, quod in nervorum inflationibus, cum hi paucis tantum vasis nutritoriis sint instructi, localia symptomata, inflammationi propria, ut calor, rubor ac tumor, minori duntaxat gradu conspiciuntur, contra dolor pungentior est et ad modum magis paroxysmorum prodit, versus ramos nervorum, velut explosiones electricae, se diffundendo. Aliud laesi et inflammati nervi

criterium id statuunt, quod, perfecto truncō nervorum supra vulnus punctionis, omnia phaenomena vehementiora deprimuntur ac morbus depellitur. (38) Facile intelligitur, in venarum inflammatione hoc accidere non posse.

6. Denique incommoda, venae inflammatione post phlebotomiam producta, fortasse cum iis permittari possent, quae oriuntur, cum aēr in venam penetrat et celeriter ad cor abripitur. Tum vero multo citius symptomata, metum excitantia, apparent; anxietas verbis vix exprimenda, coloris cutanei in coeruleum mutatio, subito turbata sanguinis circulatio similiaque phaenomena satis superque cordis affectionem indicant, quae plerumque etiam paucarum horarum intervallo, saeppe breviori quoque tempore, inter angores immunes et suffocationis symptomata, vitae finem imponit.

.....  
 (38) V. Med. Kommentarien 4 Thl. pag. 206.  
 porro: Joseph Swan's gekrönte Preisschrift über die Behandlung der Lokalkrankheiten der Nerven; a. d. Engl. v. Dr. Francke. Leipzig. 1824 pag. 101 — 103.

### C a p u t . III.

**A**ntequam, pro consilii ratione, ad curationem inflammationis venarum, post phlebotomiam infastum prodeuntis, progrediar, liceat mihi nonnulla praemittere, quae plus minus ad illam sunt referenda.

In venarum inflammationibus, internam prae-  
 sentim horum vasorum membranam affici, in qua  
 inflammatio tum rapide procedit, observationibus,  
 a celeberrimo Huntero aliisque divulgatis, suffi-  
 ciente demonstratum est. Jam quaeritur, qui fiat,  
 ut interna venarum membrana multo facilius ac  
 saepius inflammetur, quam arteriarum? Ut hanc  
 quaestionem expedit, Hodgson (39) eam afferit  
 rationem, quod membrana interna venarum ad  
 incitationem recipiendam sit proclivior quam arteriarum; huic tamen sententiae repugnare vide-  
 tur nervorum abundantia, qua sistema arteriarum  
 venarum sistema superat (40). Quantum mihi

.....  
 (39) l. c. pag. 532. V. Not. 27.

(40) V. Allg. Anatomie v. X. Bischat, aus d.  
 Franz. übers. v. Pfaff, 1802 i Thl, 2te, Abtheil. pag.  
 155. seq.

quidem innotuit, nulla alia hucusque explicatio in promptu fuit ideoque facile mihi ignoscetur, si hoc loco aliam quandam proponere audeo, quae fortasse, accuratius examinata, non omni ex parte firma videri possit et idonea. Prins vero alii quaestioni, quae in hac re consideranda mihi offeruntur, satisfaciendum esse existimo, ei videlicet: quamobrem post phlebotomiae operationem, tam crebro saepiusque ab inertissimis manibus institutam, haud frequentius venarum inflammatio oriatur, seu potius, quaenam vera sit ratio, cur, singulis in casibus, post venae-sectionem inflammatio venae incisae, tanta rapiditate ulterius diffusa, appareat?

Post phlebotomiā semper quidem in **vulnus**, ea inficto, inflammationem venarum membranae excoli, omni omnino dubio caret; nam sine inflammationis auxilio nulla cogitari potest concretio. Quare igitur haec inflammatio tam effreno impetu interdum ulterius ad majores venarum truncos propagatur? Causam hujus phaenomeni in eo querendam putarunt, quod **venae-sectionis vulnus** durante operatione ac post eam nimis contunderetur, vel haud recte clauderetur ideoque impulsibus irritantibus ut: aeri atmosphaericō, deligationis attritui, vel aliis stimulis chemicis aut mechanicis exponeretur; hinc inflammationem non satis cito posse discuti, eam potius invalescere adeoque etiam celeriter ulterius ad truncos usque venarum deferri. Haec vero momenta noxia durante phlebotomia ac post eam multo saepius adesse, quam venarum inflammatio, illa praegressa, excolatur, maximam praeceps fert veri speciem; imo ipsa experientia docet, **vulnus**, per **venae-sectionem** factum, summope-

re irritari posse, neque tamen inflammationem majorum truncorum venosorum inde consequi, et ubi nihilo minus prodit, non tamen tam violento impetu, ut in aliis casibus fieri solet, eam ulterius diffundi, ut etiam, remotis stimulis noctis, semper cito depellitur. Casus quidam notatus dignissimus, a paeceptore meo, summo honoris cultu prosequendo, Professore Struvio, mecum benevole communicatus, hic argumenti loco mihi inserviat. In puella quadam tenerae aetatis, fabri cuiusdam ferrarii filia, quae pulmonum inflammatione laborabat, medicus **venae-sectionem** indicatam reperit; **venae superficiales extremitatis superioris** vero in ea tam praeter modum erant tenues, ut, tribus venis frustra incisis, quarta (mediana quaedam), demum sufficientem sanguinis quantitatem emitteret. Duoibus diebus post, symptomata, tetanum referentia, apparebant, quae fortibus antispasmodicis devincebantur; tum autem **venae-sectionis vulnus** insigniter inflammatabantur, atque mox signa inflammationis venae laesae excolebantur, quae tamen, non obstante ejus vehementia, non latius ad majores usque venarum truncos diffundebatur. Natura enim satis conspicuam in **vulnere phlebotomiae** suppurationem efficiebat, qua magnum ferrum ramentum extrudebatur. Re diligentius indagata, patet, patrem puellae, **venae deligationem**, laxiorem redditam, renovando, pollicem, ex opere ferrario ferro limato obtectum, vulneri impressisse, qua re hoc ferri ramentum in illud protrusum erat. Quo noxio stimulo remoto, mox omnia vehementiora morbi phaenomena evanescebant, **vulnusque** sine ullo detimento, inde prodeunte, cicatrice obductum est.

Cum venarum inflammatio late diffusa in universum haud adeo frequenter sit observata, non quidem licet, huic experientiae, semel occurrenti, similes casus adjungere, veruntamen jam per se argumentis, supra prolatis, addita, affatim probare mihi videtur, irritationem localem vulneris, venae-sectione inflicti, sane sufficere posse ad inflammationem in eo, ut et in vena sursum ascendentē, provocandam, neque tamen tanquam unica causa venarum inflammationis, illius puta, quae latius diffunditur et cito mortem adserit, consideranda est. Quapropter aliam quamcunque adhuc caussam recte praesumere possumus; quam vero tantummodo in universalī vel locali statu morbo systematis venosi, sive prius jam obvio, sive serius exculto, sitam esse oportet. (\*) Cel. Puchelt auctam venositatem, praevalentem venarum vitam, momentam praedispōnens illius venarum inflammationis esse statuit, quod in primis efficiat, ut haec tam celeriter diffundatur. Multa haic defendunt sententiam; nam illa mala et incommoda, e venarum sectione orientia, frequentius illis in terris deprehenduntur, ubi aucta venositas more quodam endemicō dominatur; porro e pluribus morborum historiis, huc perituentibus, intelligimus, venarum .....

(\*) Venarum inflammationem in aegris duntaxat venis tam rapide propagari, ea forsitan etiam experientia esse poterit, quod post amputations tum tantum inflammatio trunci venarum laesi cum morte insequente appetat, si universalis qualisque cachexia ut: arthritis, scrophulosa vel syphilitica conditio, operationi praecesserit, vel adeo eidem ansam praebuerit (41).

(41) V. Erdmann l. c. pag. 215.

vitam in singulis hominibus jam ante phlebotomiam morbose fuisse excitatam. Saepe quidem invenimus, observationes, nobiscum communicatas, hac de re nullam injecisse mentionem, sed et contrarium nusquam commemoratur facileque tum haec universalis morbi venarum conditio, distincta tam difficilis, menti se potuit subducere. Nec parum fortasse experientia medicorum, in praxi versatissimorum, huic sententiae patrocinari videtur, qui contendunt, hominibus arthriticis et rheumaticis non in parte quadam corporis, tali cachexia correpta, venam esse secundam, quia faciliter venarum inflammatione inde consequatur. Etenim in ejusmodi cachexiis auctam venositatem primas saepius partes agere, negari utique non poterit. Ceterum expedientum adhuc puto, quomodo et qua ratione aucta venositas venarum inflammationi opportunitatē praebere possit, hoc consilio, ut ea sententia, cuius veritatem experientia ad hunc usque diem nondum satis probavit, saltem rationibus theoreticis magis firmetur.

Quodsi, secundum Puchelt, definitam de venarum vita praevalente notionem animo informantes, statuimus, in eadem tantum sanguinis, seu tantum carbonici et hydrogenii ad pulmones deferri, ut non amplius rite mutari possit, atque adeo majori quantitate in venis retineatur, id jam locum habet, quod congestionis nomine insignimus. Haec venosi sanguinis accumulatum vero non solum in majoribus venis, sed etiam in systemate vasorum capillarum reperitur, praecipue etiam in ejusmodi partibus, quae venositati subjectae sint, quo certe etiam venarum membranae pertinent. Quam arcto vero vinculo

congestio cum inflammatione cohaereat, optime me demonstrare posse credo, ipsa summe venrandi Puchelti verba allegando (42): „So wie die „Blutung, so schliesst sich auch die Entzündung „an die Congestion sehr nahe an, und man mag „auch einer Entzündungstheorie folgen, welcher „man wolle, oder man mag auch blos bei der „empirischen Ansicht beider Krankheiten stehen „bleiben, und ihre Zufälle vergleichen; es hält „immer schwer, beide Zustände genau von einander zu unterscheiden, ja es ist kaum möglich, „die Grenze von beiden zu finden, und es giebt „manche einzelne Fälle, in denen man es gar „nicht mit Gewissheit sagen kann, ob man es mit „einer Entzündung oder Congestion zu thun habe, „u. s. w.“

Minime hic locus est theoriam inflammatisonis proponendi ac persequendi; at certe credo, quemlibet libenter ei opinioni adstipulaturum, quod, si etiam nimiae esset audaciae, statuere, quamcunque inflammationem majori congestionis gradu, ad nervorum systema propius referendo, contineri, saltem concedendum sit, nullam inflammationem sine praegressa congestione existere posse, atque hanc partem correptam multum semper ad inflammationem praeponere. Ita enim omnino recte explicaretur, quomodo membranae venarum, praevalente organismi venositate, ad inflammationem valde sint opportunaæ et qua ratione inflammatio, jam obvia, cito ulterius ad venas aegrotas progrediatur. Si igitur, aucta venositate, accumulatio sanguinis in venis caussa est, qua venarum inflammatio, post phlebotomiam

(42) l. c. pag. 59.

quandam institutam, foveatur, post quamcunque etiam localem congestionem, alis e caussis ortam, euudem eventum locum habere necesse est. Quodsi porro venae morbus, inflammationem foveans, particularis quoque esse potest, et illa observatio explicatu esset facilis, quod, cum post venae-sectionem in brachio, trunci ejusdem venosi, inter vehementissima phaenomena morbosa, inflammatitur, phlebotomia in altero hominis brachio talibus caret sequelis; idem tamen etiam in morbo venarum universalis, ad inflammationem praeponente, contingere posset. Notissimum enim est, per antagonismum inflammationem, in parte quadam cuiuslibet systematis insigniter auctam, praepositionem inflammatoriam in parte remotiori ejusdem systematis tollere, vel saltem imminuere posse.

Quibus omnibus praemissis, quaestio denique, supra proposita, cur membrana venarum interna multo facilis ac frequentius, quam arteriarum, inflammetur, expediri posse videtur. Membrana videlicet interna venarum, secundum disquisitiones doctissimi Marx (43), praeter alias notas distinctivas, eo potissimum a membrana arteriarum discernitur, quod facilis extenditur multoque est tenuor ac tenerior; hinc ad eas organismi partes pertinet, quae magis quam aliae sanguinis congestionibus sint subjectae quibusque facilis quoque inflammatio excoli possit. Lubens fateor, hanc explicandi rationem paullo altius repetitam videri, attamen imperfectam eam potius quam falsam existimaverim; nam, ni fallor,

(43) Diatribe anatomico-physiologica de structura atque vita venarum. Carlsruh. 1819 pag. 34.

major vel minor ad inflammationem opportunitas membranae internae vasorum sanguiferorum plus minus etiam e natura sanguinis, eadem immediate contingentis pendet, quod utique tam diu conjecturae speciem prae se feret, quoad observationes posteriores rationem, quae inter sanguinem ejusque parietes, tam in statu sano quam morbo, obtinet, accuratius investigaverint.

Quod vero curationem venarum inflammaturum, ob phlebotomiam inauspicatam ortarum, attinet, hoc loco praecipua tantum et cum supra dictis aliquo modo conjuncta, proferam, curandi autem pracepta, quae vasorum inflammatio in universum desiderat, breviter duntaxat attingam.

Cura venarum inflammationis, phlebotomiam sequentis, commode in tria momenta prima ria dividi potest, curam videlicet prophylacti cam, curam initio morbi adhibendam, eamque denique, qua, morbo jam latius diffuso, et cum phaenominis universalibus iisque vehementibus con juncto, uti debemus, continentia.

Curae vero prophylacticae in primis animus est adverterendus; cum quia hoc malum, ubi jam prodiit, licet curatio, quantum fieri possit, rationalis adhibita sit, secundum omnes fere, quae hucusque institutae sunt, observations, cito mortem adducit, tam quoniam morbi istius prae cavendi studium saepius neglectum est, e quo tamen paene solo auspicatissimum eventus esset augurandus. — Ante omnia igitur monendum videtur, in qualibet venae-sectione quamcunque, minimam adeo, irritationem vulneris incisi vi tandem esse; nam quamvis verisimilimum sit, conditionem morbosam venarum, universalem

vel localem, simul intrahtem, rapidiorem propagationem et letalem eventum inflammationis venarum afferre, non minus tamen certum est et exploratum, auctam illam venositatem vel aliam in venis congestionem, quas primarias morbi caussas statuimus, saepius obscuris admodum symptomatis dignosci atque adeo haud raro negligi. Praeterea e casu, supra allato, (vid. pag. 29) intellectimus, irritationem mere localem venarum inflammationi efficiendae sufficere posse, quamvis haec non tam late diffundatur. Neque denique a vero abhorret, statim post venae-sectionem, occasione aliqua oblata, venositatem corporis in universum augeri, praesertim vero in venis ejus partis, in qua phlebotomia exercebatur, sanguinem accumulari posse; hinc inflammatio loci phlebotomati, irritationē supervacanea aucta praeterque normam vulgarem morata; eadem celeritate in venarum truncos diffunderetur, ac si hi jam prius ad inflammationem opportuni fuissent. Ut huic igitur curandi pracepto satisfiat, ~~et~~ mea sententia, momenta sequentia sunt consideranda.

1. Venae-sectione instituatur in loco, huic operationi idoneo, (\*) tum ne perperam vena incidatur, tum ne apertura scalpelli nimis sit exigua.

.....

(\*) Intelligi vix potest, cur plerumque ipsae vene, in flexura brachii obviae; aperiantur, quae tamen ob vicinas majoris momenti partes ut: ob nervos, tendines et arterias; locum phlebotomiae valde incommodum offert. Nisi rei conditiones peculiares venae-sectionem hoc in loco requirant, alias profecto sem-

Ambobus enim in casibus operationis repetitio foret necessaria.

2. Ob eandem caussam scalpellum adhibetur idoneum, acutum, firmaque manu operatio absolvatur.

3. Antequam phlebotomiae vulnus claudatur, illud ipsum et quae circumjacent spongia madida sunt purganda et quam maxime attendum, ut haec antea bene sit lota et a sordibus, e priori forsan usu contractis, perfecte repurgata.

4. Tum vulnus, nimia tamen irritatione viciata, examinetur, num forte instrumenti fragmentum, vel aliud corpusculum, male irritans, in eodem haereat; quo facto, caute est removendum.

5. Nunc demum vulneris labia accurate sunt committenda, quod faciendo communiter vulnus manus alterius pollice contegitur; inde pernecessarium est, ut hic pollex purissimus sit et prius ab omnibus arenae, pulveris sternutatorii et cet. micis, forte obviis, liberetur. Idem valet de spleniola, qua venae-sectionis vulnus tegitur; non prius jam adhibita in usum est vocanda, vel saltem non antequam lotione perfecte sit repurgata. Melius forsan esset, si, loco spleniola, phlebotomiae vulnus simpliciter quadam emplas-

.....  
per esset eligendus. Loca enim utique reperiuntur plurima, ubi venae aequae perspicue distinguendae et ad operationem multo commodius sitae sint, e. g. venae radiales et cubitales externae in medio antibrachii et cet.

ri Anglicani particula, 1 pollicem longa totidemque lata, contraheretur et conglutinaretur, quae in aliqua membra quiete non dejicitur.

6. Dein vulnus emplastris vel deligatione ab aeris aliorumque momentorum noxiorum aditu est tuendum.

7. Post quamlibet venae-sectionem nostri est, aegroto imperare, ut partem, ubi phlebotomia instituebatur, omnino quietam servet; nam venae deligatio, quae nec nimis arcta vulneri inhaerere debet, facile loco suo movetur, imo ipsi muscularum eorumque tendinum motus in punctionis vicinia labia vulneris jam loco movere adeoque haec noxiae fasciationis irritationi possunt expouere.

8. Quodsi, quamvis omni cautione adhibita, in venae-sectione instituta tamen punctionis errore, vel aliis casibus mali ominis, punctionis vulnus nimis fit angustum, aut si vena incisa aliis ex caassis vel nullum omnino sanguinem, vel nimis parcum, emittit: suadendum foret, ne nimis multa sanguinem ex apertura venae obvia ducendi experimenta instituerentur, sed potius post primos ejus generis conatus, quibus, ne vas sanguinale laedatur, diligenter cavendum, irritos, alias locus, operationi idoneus, eligeretur.

9. Postremo, quae exstant, experimenta, satis ostendunt, si aliquot horis post venae-sectionem repetita sanguinis missio indicata est, recentem punctionem plus minus a priori remotam, et, si fieri possit, in alia vena esse instituendam, primorum enim cicatrisationis conatum in quo-

dam venae vulnere turbatio multo saepius venarum inflammationem adducit, quam exigua laesio, nova phlebotomia effecta.

Quodsi observationibus posterioribus sententia, supra allata, vel magis confirmaretur, qua statuitur, congestionem in venis universalem vel localem, ex aucta organismi venositate aut aliis rationibus prodeuntem, primariam esse caussam, cur venarum inflammatio post venae-sectiones tam cito ulterius diffundatur, ad illam praecavendam, inprimis adhuc esset attendendum, ut durante phlebotomia et aliquo post eam tempore elapsa, omnia ea diligenter vitarentur, quae vitam venarum auctam, vel in universum generalem aut ex parte factam accumulationem sanguinis venosi, possent promovere ac provocare. Hac ratione in primis: a) cibi nimis largi ac nutrientes sunt vitandi, quoniam, plus materiae alibilis, quam qua corporis indigeat, praebendo, venositatem morbose augent et excitant. Alimenta e carne parata, aromata, potulenta valde nutritia, calefacentia et cet. eam ipsam ob caussam sunt dissuadenda. — b) Omnes vehementiores animi affectiones et commotiones itidem magnopere sunt defugiendae, quia simili modo nimis excitando in systema venosum agunt; idem etiam dicendum de somno nimis protracto, de vigiliis, de omnis generis intemperantia, luxuria nimia, saltatione et cet. — c) Denique omnes causae mechanicae, ut: pressio, ictus, venarum contusio et cet. sunt amovendae, quod sanguinis affluentiam, modum excedentem, efficiunt.

Porro ad illam venarum inflammationem praecavendam, corporis conditio aegroti ante quam-

libet phlebotomiam diligenter est examinanda ac reputandum, annon jam nunc venarum vita in universum aucta e signis plus minus certis, hic non afferendis, cognoscatur. Quae si adest et si contra-indicationes indicationes ad venae-sectionem superant, haec est praetermittenda atque hirudinibus, cucurbitulis et cet. supplenda. Quodsi, non obstante hac venosi systematis ad inflammaciones proclivitate, venae-sectionis adhibendae necessitate urgemur, eo cautius est instituenda omnesque cavendi rationes, supra memoratae, eo religiosius erunt observandae, nec minus cura nostra diaetetica et therapeutica praecepue versus opportunitatem inflammabilem systematis venosi erit dirigenda. In casibus, ubi venarum adauita vitalitas haud perspicue vel omnino non indicatur, ubi vero e 'caassis praegressis vel adhuc agentibus recte conjicere licet, sanguinem venosum in quacunque corporis parte collectum esse et coacervatum, hac in parte a phlebotomia est abstinentum, sed alia potius, eaque quam remotissima, eligenda. Jam Hippocrates (44): Τας οὐν φλεβοτούλας, inquit, δεῖ ποιέσθαι κατὰ τοντέου τοὺς λόγους. ἐπιτηδεύει δι χρὶ τὰς τοιας ὡς προσωτάτῳ τέμνειν τῷ τῷ χωρίῳ, εἴτα ἀν αἱ οὖντις μεμαθητησι γίνεσθαι καὶ τὸ αἷμα συλλαγέσθαι.

Cum vero post venae-sectionem institutam symptomata apparnerint, quae incipientem jam venarum inflammationem innuerent, hanc

(44) Hippocratis de natura humana; — vid. ejusdem opera ed, Foesii. Francofurti — 1595 fol. sectio III. pag. 9

quam citissime comprimere necesse est. Quare acriter et magna cum circumspectione id est agendum, ut caussae prodentis inflammationis, forte obviae, inveniantur et, quantum fieri possit, removeantur; tum vero mox ad curam certam, eamque praesertim localem, antiphlogisticam, progrediendum est. Initio morbi inflammatio in venis superficialibus magis residet, atque tum, ut experientia quodammodo demonstrat, majore jure sperari potest, eam sanguisugis, in cursu venarum applicatis, fomentis frigidis, si inflammationis resolutio est exspectanda, vel contra cataplasmatibus calidis, si suppuratione evitari nequit, coerceri posse. Diaeta ac regimen, prædispositionem inflammabilem systematis venosi respiciendo, prudenter et provide constituantur; ante omnia perfecta membra, in quo venarum inflammatio prodiit, quies est commendanda.

Ad inflammationem cito cohibendam, plures adhuc rationes commendatae sunt. Cel. Hunterum in finem in superiori inflammationis parte pressionem in venam, ope fasciae Rhedani adhibendam, proponit, ut hoc modo vasis conglutinatio efficiatur, progressum inflammationis impediens; sed saepe difficillime constituitur, quam late inflammatio jam sit progressa, atque si quis venam eo forte loco reprimeret, ubi jam inflammativa est, eo ipso utique malo cumulum adderet. Porro contactus parietum venarum, vis mechanicae auxilio, certe quoque tanquam incitamentum eorum est considerandus, et si trunci venarum jam sua sponte ad inflammationem sunt proclives, quod supra demonstrare co-

nati sumus, compressio venarum inflammationem provocaret, quae antea non adfuerit. — Hodgson (45) contra statuit, magis congruum esse, si pressio in venam infra locum inflammatum instituatur, quia hac ratione sanguinis congestio ad locum venae aegrotum coercetur. Verum vero eo quod ulteriore progressum sanguinis copiae ad venam inflamatam coercemus, profecto non quaevi causa permanentis ac latius fusae inflammationis removetur; sanguinis vero congestionem in ipsa membranarum venosarum substantia pressione tollendi consilium vix prospere cederet; praeterea ipse Hodgson recte adfirmat, pressionem in inflammatione semper ambiguum esse incepit.

Ceu remedium certissimum ad progressum venarum inflammationis inhibendum, suaserunt alii, venam supra locum aegrotum e transverso omnino esse persecandam, ut ita continuitas parietum plane tolleretur. Hoc vero tum tantum fieri posset, si partem vasis nondum inflamatam sine magna opera cum instrumentis attingere licet, i. e. si inflammatio nondum in venas profundas transierit. Phlebotomiae vero operatione, modo supra allato, cautissime instituta, cum adeo causa inflammationis, eam sequentis, non in ipsa operatione, sed in vase, minimo stimulo accidente, facile inflammabili, posita est, intelligi haud potest, cur non nova venae laesio eodem

(45) l. c. pag. 53<sup>a</sup>.

modo ejusdem inflammationem provocare possit, quo jam praesens effecta est. Major successus e tali methodo foret exspectandus, si accurate expidiri posset, in casu quodam speciali phlebotomiam, ob quam venarum inflammatio excolebatur, quam inertissime institutam, praeterea vulnerum incisum fortis contusiones aliasque laesiones passum esse, vel adeo corpusculum aliquod stimulans in vnlnere remansisse; ut paucis omnia complectar, si demonstrari posset, partem venae nondum inflamatam perfecta gaudere sanitatem. Tum vero, remotis noxiis momentis, in **vulneris agentibus**, et cura locali antiphlogistica, ex omni parte idonea, adhibita, sua sponte evanescet.

Restat, ut ei quaestioni respondeatur: num, si post phlebotomiā venarum inflammatio prodiret, audendum esset, adversus hanc inflammationem aliam venae-sectionem instituire? Multa experimenta probant, id sine omni detimento fieri posse; nova vero venae-sectione alia eaque remotori corporis parte institui debet. In quocunque autem casu tamen quadendum erit, ut prius omnino persuadeamur, in parte, ad hunc finem electa, nullam nimis magnam venosi sanguinis congestionem obviam esse, uti tum etiam operatio eo majori cautione est perficienda.

Quod ad curationem venarum inflammationis, e phlebotomia ortae, in seniori ejus decursu attinet, ubi jam venas profundas corripuit et symptomata neryosa perspicue distinguuntur, intra fines regionis valde caliginosae ingredimur, et omnia hac ratione hucusque experta prognosin sistunt tristissimam. Quantum quidem casus, ad hunc usque diem observati, morbique vi brevi tempo-

ris spatio mortisera concesserunt, plures curandis rationes adhibitae sunt; nunc praesertim in progradientem venae inflammationem, nunc unice adversus symptomata nervosa, metum excitantia, medici, sed frustra omnino, pugnarunt. Nihilominus accuratius decursum hujus morbi observanti hoc saltem certum esse videtur, symptomata nervosa non esse morbi cuiusdam nervosi quasi repercussionem, sed conditionum morbosarum spherae productivae ope effici, tum vero nequaquam adhuc dubium est, num et serius secundum methodum antiphlogisticam agendum nobis sit. Geterum curatio hoc in stadio symptomata universalia et characterem febris sequitur, atque singulis in casibus semper adhuc solertiae medici practicae relinquitur, qualem sibi e magna phaenomenorum copia morbi, imaginem compонere velit, ad quam ejusdem curam possit dirigere. Generalis igitur curatio secundum diversas complicationes ac varia symptomata, maxime eminentia, diversa sit, necesse est. Sed et in hoc morbi stadio probe est tenendum, predispositionem in venis inflammatoriam, et quidem probabiliter sanguinis congestionem, sive prius jam adfuerit, sive phlebitidis initio demum sit progenerata, celerem hujus progressum adjuvare. Specialiora praecepta, quibus cura regi debeat, singulatim hoc loco enumerandi consilium longius nos a scopo proposito abducere.

Obtinente locali malo, semper adhuc methodo antiphlogistica nobis est utendum; quare hirudines, cucurbitulae, remedia derivantia, emollientia, cataplasma, vaporationes et cet. pro re nata commendanda sunt. Suadent quidam

in primis, ut membrum, in quo venarum inflammatione se diffuderit, emplastro, Laudano humectatio, cingatur. (46)

Omnibus denique venarum inflammationis signis evanescentibus, quod saepe brevi ante mortem aegroti accidere solet, ubi plerumque venae ejus membra, in quo phlebotomia instituta fuerat, jam in suppurationem vel indurationem transierunt et majores venarum trunci cordique propiores magis sunt affecti, universalis magis febris conditio est respicienda ac foriter contra eam agendum, tandem etiam inflammationem majorum truncorum venosorum ratione antagonistica derivantibus oppugnare connitamur, quae tamē opera, quoad successum, vix medici votis respondebit.

.....

(46) V. Kurze Abhandlung der Operativ-Chirurgie etc. von Carl Averill, a. d. Engl. übers. Weimar 1824 pag. 314.

.....

#### C a p u t . IV.

**S**ub' finem dissertationulae historiam venarum inflammationis cujnsdam, phlebotomiam excipientis, quae non ita pridem in nosocomio nostro academico observabatur, eidem mihi liceat adficere.

Reinholdus Falk, medicinae studiosus, juvenis alacer, 22 annos natus, habitu corporis robusto, pleno, cum signis venositatis praevalentis, statuta vix media, vividus admodum atque in corporis motibus ingeniique conatibus acer et sedulus, a teneris ungniculis semper firma gayitus erat valetudine, illud si exceperis, quod circa pubertatis tempus et annis mox sequentibus saepius cum morbis inflammatoris omnis generis, in primis vero pectoris, quibus habitus ejus valde plethoricus majori gradu opportunus erat, ei colluctandum fuit. Primis diebus mensis Martii an. 1826 satis subito a laryngite corripiebatur, cuius caussae occasio[n]es inveniri haud poterant, quae autem praecipue in cutis actione depressa quaerendae videntur. Die tertio Martii, cum laryngitis sy[m]ptomata augeri pulsumque magis febri-

citatem moveri aegrotus sentiret, institutum clinicum hujus loci adibat, ut vena ei incideretur. Idoneo et acuto scalpello vena cephalica magna non procul ab ejus origine aperiebatur ac *vulnus sectionis*, cum circiter 8 vel 10 sanguinis unciae detractae essent, usitata in phlebotomia fasciatione cladebatur. Quo facto, laryngis inflammationis symptomata extenuabantur, sed incommoda in universum valetudo, anorexia, horripilatio momentanea, cum sanguinis orgasmo versus pectus et caput per vices mutata, et animi morosa affectio, quae saepe in acerbissimam iram et indignationem convertebatur, continuo adhuc patientem exagitabant; interdum jam levem tensionem ac gravedinem in brachio sinistro querebatur, quam vero tanquam fasciae, nimis firmiter appressae, sequelam, neglexit. Statum suum morbosum omnino parum respiciens, aegrotus his 2 vel 3 diebus corpori non utique pepercerat, more solito negotia suo sedulo obierat atque, tempestate aspera, frigida ac simul humida, saepe multumque sub dio se moverat. Multo mane d. 5to Martii, quamvis brachium patiens ac morbi symptomata universalia neutquam in melius essent mutata, tempestate frigida et immitti, iter haud adeo longum in praedium, a Dörpatio 20 millaria Rossica (Wersi) distantem, suscepit. Hic tamen animadvertendum, vestem leviorem (Frack), qua indutus erat, stricte admodum brachis inhaesisse, qua re dolores et tumor brachii affecti, praesertim si vel minime inflecteretur, valde increaserant. Cum ad locum praestitutum pervenisset, aegrotus conditionem suam insigniter pejorem sensit, ita quidem ut uestes exuendae et lectus ei esset petendus; brachium nunc deprehendebat

tur calidum, tumens et circa venae-sectionis vulnus leviter rubescens. Aliquot horis post magnae respirationis molestiae et satis fortes convulsiones apparebant, quae mox in totius corporis anatasis, cum sensu quodam formicationis per spinam dorsi, cutis temperatura per vices mutata, pulsus irregulari, intermittente et ceterum transierunt; oculis clausis aegrotus delirabat, non vero apertis. Hic status per duas fere horas perseveravit, dein major quies revertebatur. Medicus quidam, nondum adhuc in arte exercitatus, aegroti amicus, qui praedii in propinquuo aderat, jam Opium in pulvri forma ordinabat et cataplasma localia applicare jubebat. Nox inde a 5to ad 6tum d. Martii integra fere magna inquietudine pervigilata est. D. 6to Martii similis accessio convulsiva iterum observabatur; venae-sectionis vulnus semper magis inflammabatur, brachium fortius intumescebat; pulsus erat frequentior, irregularior, durior; aestus universalis et rubor cutis augebantur. Iam sanguisugae brachio aegroto applicabantur et pulveres e Mercurio dulci ad niteriorem usum praecipiebantur. In sequenti die insultus quidem spasmodicus haud apparebat, sed alia morbi phaenomena magis invalescebant; praecipue venae-sectionis vulnus fortius erat inflatum, dolor vero ac tensio in brachio affecto multo, quam antea, vehementior. D. 7mo Martii clinici therapeutici Directoř, qui diebus proxime praecedentibus absens, praecepta sua medica per litteras tantummodo dare potuerat, a judicio academico Dorpatensi provocatus, ipse in rus ad aegrotum visendum proficisci ebatur morbi statum sequentem deprehendit: pulsum durum, plenum, frequentem; genas fortiter rubentes; fe-

brem haud mediocrem inflammatoriam; dolor in brachio affectio directe secundum venae brachialis profundaes cursum, ad axillam usque ascendebat ac valde erat acerbus; e venae-sectionis vulnere, si contingenterit, pauculae guttae puris benigni scaturiebant; reliqua vero brachii loca dolentia ubique dura admodum et fortiter inflammativa conspiciebantur, ita ut omnino metuendum non esset, venae inflammationem in suppurationem jam transiisse; cetera morbi symptomata ut autem. In universum autem nondum phaenomena animadversa erant, animum ita moventia, ut jam subitanus mali in mortem exitus praesumti potuisset. Nihilominus non erat quod dubitaretur, aegrotum sine mora summaque providentia Dorpatum esse transportandum, ut continua medicorum opera uteretur et idoneis hominibus curandus ac fovendus tradereetur. Die gno Martii patients, culcitis bene munitus, post 5 horarum vecionem, quae ne minimam quidem vim noxiari in conditionem ejus morbosam exseruerat, Dorpatum pervenit statimque in nosocomium academicum deducebatnr. Hic omni bihorio pulvis, unum Colomelanos granum continens, cum saccharo, et ad deprimentiam vasorum systematis actionem sequens mixtura portigebatur:

Rec. Nitri depurati 3jj.

Solv. in aq. dest. 3vj.

Syrup. Berber. 3j.

M. S. Omni bihorio i cochlear cibarium sumendum.

Ob curam localem imperabatur, ut in supe-

riorem venarum regionem fomenta glacialia, ad discutiendam inflammationem, sub axillam adusque ponerentur, venae-sectionis vero **vulnus suppurans**, ad leniendum dolorem ac tensionem, cataplasmatibus emollientibus contegeretur. Ad victimum juscula, e pomis confecta, praescribebantur. Vesperem versus mixturae, supra memoratae, 12 adhuc grana Hyoscyami adjiciebantur, quia aegrotus levem tussiculam irritantem accusabat.

Duebus diebus proxime sequentibus statim aegroti insigniter in melius mutabatur; febris cessabat, pulsus erat quietus; tumor, aestus et dolor affecti brachii, praeципue in superiori regione, valde erant imminuti, quapropter etiam fomenta glacialia intermittebantur; in regione vero circa phlebotomiae vulnus, ubi suppuratio permanebat, semper adhuc cataplasma emollientia applicabantur. Curandi ratio interna, cum rei esset accommodata, continuari poterat, Mercurius dulcis vero necessario erat seponendus, quoniam alvi dejectiones colliquativae et exhaustientes apparuerant.

Die 12mo. Martii febris et reliqua affectio universalis rursus priori vehementia praesto erat. Praeter alvi dejectiones crebras colliquativas, adhuc perseverantes, frequentes etiam ructus, manus sapor in ore, borborygmi in abdomine, lingua, crassa atque decolore pituita obducta, et certatis vehementem organorum, ciborum digestioni inservientium, ventriculi inprimis, affectionem indicabant. Nitrum, cui hic effectus noxious forsan erat attribuendus, hanc ob causam igi-

tum omittebatur, ejusque loco sal quoddam mitius, idque minoribus dosibus praebendum, pulsu jam non adeo irritato, eligebatur, quod quidem alvum solutiorem faceret, sed non tanto impetu ventriculum invaderet. Hunc in finem praecipiebatur:

Rec. Tart. tart. 3jj.

Solv. in aq. dest. 3vj.

Syr. Berber. 3j.

M. S. Omni bihorio 1 cochlear sumendum.

Tussicula irritans adhuc quidem morabatur, sed cum extractum Hyoscyami ab aegroto respueretur, illud omittendum erat.

D. 14to Martii. Jam abhinc tres dies aegrotus tam morosus et difficilis evaserat, ut vix ad quaestiones, conditionis eius explorandae gratia ei propositas, et hand sufficienter quidem responderet; tali modo fieri non potuit, ut pectoris molestiis animus advertebatur, quae mox post tumorem brachii imminutum adfuerant ed ad illud usque tempus perseveraverant, sed nec respirationis difficultate conspicua, nec doloris interni significatione in yultu patientis, durante inspiratione, indicabantur. Hodie vero versus vesperem respirationis molestiae increscebant, neque tamen omnino ea ratione apparuerunt, qua in pneumonicis deprehendi solent; tussicula continuabat quidem, sed in profunda inspiratione minime augebatur; spirations semper brevi tempore et ex intervallo se invicem excipiebant; signa om-

nia sanguinis versus pulmones congestionis prodibant; aegrotus sanguinem quoque expuebat atque jam vehementibus pectoris incommodis vexatus, sponte fatebatur, se jam superiori nocte sputa cruenta animadvertisse. Pulsus depresso, durus et acceleratus sentiebatur; calor in ore ac siccus increverant. Per phlebotomiam igitur, dextro in brachio institutam, 6 sanguinis unciae deiratae sunt; quo facto, pulsatio insigniter attollebatur et omnia symptomata inflammatoria; ut et pectoris incommoda, ita imminuebantur, ut adeo per paucas horas patiens somno satis tranquillo sopitus jaceret. Affectio brachii localis sensim sensimque remittere videbatur; tumor, calor ac dolor in eodem valde erant levati. Alvi dejectiones colliquativae jam abhinc 2 diēs cessaverant. In usum internum nunc ordinabatur:

Rec. Cremor. tart. grx.

Extract. Hyoscyam. grβ.

Sacchari albi grv.

M. F. P. dent. tal. dos. No. xjj.

S. Quavis hora pulvis sumendus.

Potui aegroto praehabuntur 2 drachmae Acid. tart. cum duabus uncisi sacchari, in aquae quantitate sufficiente solutae. Noctem versus sputa putulenta rarius semper ejiciebantur.

D. 15to Martii tamen omnia morbi symptomata ad eum usque gradum, quo ante venae sectionem hesternam apparuerant, augescabant; nunc igitur rursus ad Nitri usum procedebatur, et ad conditionem magnopere inflammatoriam varorum systematis deprimendam, repetita venae-

sectio, unam sanguinis libram largiter detrahens, instituebatur, quo facto, denuo magna status morbosum tum universalis, tum localis, levatio conspicua erat.

Sed nocte inde a 15to ad 16tum d. Martii phaenomena morbi, metum excitantia, summum fastigium sunt assecuta; pulsus valde depresso apparebat; respirationis molestiae mirum in modum ingravescebant, cum pectoris doloribus et anxietate excruciantे conjunctae; genae fortiter rubefactae conspiciebantur; cutis erat sicca et, manibus attractata, ardorem pungentem prodebat; deliria quoque vehementissima adsociabantur, prædesertim palpebris clausis aegrotum valde exagitantia. Die 16to Martii igitur mane hora 4ta sanguis denuo e brachio dextro mittebatur; nihilo minus aegrotus paene non omnino levatum se sensit; nec respiratio aliquatenus liberior est facta; ructus, hucusque mediocres, nunc in singulum vehementer transierant; pulmonum serum colore subnigrum adoptavit; rubor genarum magis fuscus atque margine e flavo livido arcte circumscriptus observatus est; et reliqua corporis eius ut fere in ictero tincta apparuit; organa digestionis multum affici coepérunt; dolores in regione ventriculi ac tensio in regione epigastrica cum phaenomenis, meteoristicis prodierunt; pulsus parvus, vix sensibilis et valde acceleratus fuit, virium defectio cito increvit, id quod Moschi usum suadebat.

Rec. Moschi optimi

Calomelanos aa grj

Sacch. alb.  $\frac{D}{\beta}$

M. F. P. dent. tal. dos. No. xjj.

S. Ter quotidie pulvis sumendus.

Extrinsecus vesicatoria camphorata pectori ac brachiis applicabantur. Neque praetereundum, affectionem localem brachii sinistri nunc prorsus cessavisse; tumor multum extensus et inflammatio hujus extremitatis, sine omni externe conspicua suppuratione, penitus evanescat, uti et motus ejusdem brachii erant expeditiores; venae-sectionis vulnus vero, prius suppurans, jam cicatrice omnino obductum conspiciebatur.

Diebus insequentibus irritabilitas, et agendi facultas in systemate vasorum ac nervorum semper magis extinguebantur; mox etiam torpor universalis et deliria mussitantia apparebant; calor in ardorem mutabatur, pulsus parvi sentiebantur et non amplius numerandi; accedebant sudores frigidi ac reliqua colligationis signa. Jam Camphorae adhibendae necessitas patebat, quae hac forma portigebatur.

Rec. Camph. gumm. arab. subact.  $\frac{D}{\beta}$

Aq. destil.  $\frac{Z}{ix}$

Aceti vini puri  $\frac{Z}{i}$ .

M. S. Omni bishorio cochlear cibarium sumendum.

Porro totius corporis lotiones cum aceto vini calido instituebantur, sinapismi pectori ac brachiis applicabantur et cet; — nihilo minus vita patientis magis magisque extinguebatur; respi-

ratio impeditior reddebat; tandem d. 19no Martii mane hora 11, inter vehementia suffocationis symptomata, e vita decessit.

In cadaveris sectione, die post mortem instituta, thorace adaperto et sterno sublatto, 16 fere librae seri turbidi, verum duntaxat in dextro thoracis cavo, reperiebantur. Pulmo dexter cum decima circiter superficie suae costalis parte pleurae annexus erat, sinister vero ubique liber. Pulmo dexter corrugatus et a sero libero, ei interjecto, adeo compressus deprehendebatur, ut in interiori ejusdem parte nulla fere aëris vestigia animadyterentur. In superficie pulmones lympha ex cinereo albicante obducti, a parte posteriori vero sanguine nigro erant repleti; hinc speciem prae se ferebant ex atro rubentem. Ea pleurae pars, quae saccos pleuriticos format, nullam ostendebat deformitatem, quapropter statui potest, tum serum illud turbidum, dextrum pectoris cavum replens, tum etiam lympham illum, pulmonum superficiem confegetem, originem suam vasis pulmonum exhalantibus debere. Persectis pulmonibus, sinister normalis fere videbatur, contra textus cellularis dextri a sanguine coagulato ita erat compressus, ut propemodum substantiae hepaticae speciem referret; subfuscus enim erat, jecinori similis, leviter atque colore e ravo coeruleo marmoratus. Cum igitur tali ratione vesiculae pulmonales intra substantiam e rubro atram successive immobiles redderentur, ab ultimo inspirato aere, parva quantitas in celulis inclusa, superficiem pulmonum petebat, iHucve protrusa, in vesicularum formam velamen palmonum attollebat. Venae pulmonum collap-

sae conspiciebantur, eorum arteriae contra sanguine turgentes. In aspera arteria ac bronchiis, praeter tenuem spumae, sanguine tinctae, copiam, nulla alia abnormitas observari poterat. Quod ad cor ejusque involucrum attinet, ultimo mox loco, cum de explorato brachio sinistro sermo erit, hac de re mentio injicietur.

Abdomine adaperto, intestina flatibus distenta, nulla vero in iis alia phaenomena morbosa inveniebantur. Hepar, lien et reliqua abdominis organa sana erant.

Antequam brachium sinistrum secaretur, externa ejus species rite examinabatur atque in eodem nec tumor, nec aliud quocunque signum inflammationis, vel morte interruptae vel prius obviae, si forte parvam cicatricem, phlebotomia effectam, excepitis, deprehendebatur. Venae-sectione vero instituta erat prope condylum externum brachii, ubi vena magna cephalica oritur. Quae vena igitur inde ab ejus origine usque ad locum venae axillaris, ubi haec in venam subclaviam mutari incipit, in toto suo decursu diligentissime explorabatur; multis in locis omnino destructa reperiebatur, ita quidem, ut nulla parietis ejus vestigia discerni possent; ubi vero aliter res sese habebat, sanguine erat vacua, spatiosa, ac tunicis laxis circumdata. In condyli externi vicinia, ubi interstitia muscularia pure bona indolis erant repleta, pus simul venae ramos circumfluebat. Naturae vis medicatrix inflammationem in hac vena iis locis, ubi ejus membranae adhuc relictae erant, discussisse ac maximam puris par-

tem resorpsisse videbatur. Vena vero brachialis, quae hoc in homine simplex fuerat, ut et vena subclavia et jugularis sanguine impacto et coagulato turgebant, telaque cellularis, has venas cum partibus circumiacentibus connectens, firmior erat, crassior et sanguine nigro repleta. Inde a vena brachiali ad venam usque cavaam superiorem omnia thrombo tenaci, e lympha coagulabili ac sanguine spissato constante, clausa et invia erant facta. Membranae dictae venae inflammatae deprehendebantur, et a sanguinis massa grumo-so-fibrosa insigniter compressae. Vena cava superior meabilis quidem erat, sed, una cum sacco venarum cavarum, in parietibus suis extensa, laxa, inflammata et colore ex fusco rubro tincta; multum etiam, uti et dexter cordis ventriculus, sanguinis continebat. Reliqua cordis cava sanguine erant vacua neque ullas alias a statu normali aberrationes exhibebant. Cavum pericardii a quocunque exsudato liberum conspiciebatur, uti et ipsum pericardium sine abnormitate inveniebatur.

**Epicrisis.** Quatenus nonnulla ex iis, quae tribus prioribus hujus opusculi capitibus prolata sunt, ad morbi casum modo memoratum referri eique accommodari possint, quantopere igitur casus hic specialis veritatem supra dictorum confirmet, id quidem hoc loco fusi exponere supervacaneum existimo, quoniam rebus temere repetendis ansam et occasionem mihi praebet. Hoc tantummodo monendum duxerim, et hic, quod ad momentum causale venarum inflammationis, phlebotomiam excipientis, in exemplo

allato obviae', attinet, magna cum probabilitate statui posse, venae-sectionem per se vix malo ad exitum tam cito letalem perducendo sufficiunt fuisse. Constitutio autem aegroti venosa et hic testatur, jam prius congestionem sanguinis in venis adfuisse, quam, cum aegrotus statim post venae-sectionem multis modis a regime, conditione suae idoneo, aberraverit, magnopere augeri et in locum jam affectum dirigi' oportebat. — Notatu dignissima, in primis quoad prognosin, videtur insigniter jam in melius mutata aegri versus diem septimum valetudo. Jam saepius observatum est, omnia morborum symptomata subito evanescere, et semper quidem brevi antequam malum eo vehementius ac mortem repentinam adducens, erumperet (47). Quod certe phaenomenon non ita facile explicatu est, quam primo intuitu appetet; nam si quoque concesseris, curam efficacem antiphlogisticam venarum inflammationem, cum morbi symptomatibus vehementibus et uniyersalibus, ex ea pendentibus, aliquamdiu deprimere potuisse, hoc tum tantum cogitari potest, si resolutio, suppuration vel aliis inflammationis exitus in vena inflammata locum habuit. Quae vero causa suberat inflammationi denuo tam subito et multo quidem vehementius prodeundi? Multas hic licet explicandi rationes commemorare, sed, ni fallor, ulteriores de-

(47) V. Erdenann l. c. p. 217.

mum hujus phaenomeni observationes ejusdem caussam melius illustrabunt.

Quoad inflammationem pulmonum, quae versus decimum diem morbo adsociabatur et, demonstrante sectione, exitum in pulmonis dextri exsudatione invenerat, causa ejus praecipue in praedispositione quadam pulmonum inflammatoria, prioribus pulmonum affectionibus allata, nec non in turbatione circulationis pulmonis dextri, venae-sectione producta, quaerenda videatur. Accidente vero hoc malo, et praecipue rebus ita comparatis, ut non satis mature dignosci ac tolli posset, mortem eo adhuc matnrius consecutam fuisse, consentaneum erat.

Postremo adhuc memorabilis inflammationis migratio in venis respicienda est. Ut e destructionibus, in venarum parietibus obviis, conjicere licet, inflammationem primo inde e phlebotomiae loco in vena cephalica magna adnsque ejus exitum in venam axillarem processisse, tum vero nsque ad venae cayae superioris originem et in venam jugularem diffusam esse, simul autem contra sanguinis cursum e vena axillari in venam brachialem profundam descendisse, necesse est. Hinc vix erit dubitandum, venarum inflammationem et contra sanguinis cursum diffundi posse. Cur vero venarum inflammatione non simili modo, statim post primordia sua et deorsum in venam radialem externam, quae, si rem vere aestimemus, per venam cephalicam magnam continuatur, vel etiam in venas medianas, quibus itidem conjuncta est, transierit, porro, cur non et reliquae venae, vena

inflammata axillari ac subclavia exceptae, itidem ab inflammatione correptae sint, expeditu forsitan nimis esset difficile.

---

THESES DEFENDENDAE.

1. Maximus congestionis gradus inflammatio est.
2. Rubor et expansio vasorum sanguiferorum in mortuis per se minime sunt certa praegressae inflammationis signa.
3. Qnamdiu vitae rationem internam explicare non possumus, idonea etiam morbi definitione carebimus.
4. In casibus obstetriciis, ubi mechanicum auxilium, manibus tantum adhibitis aequa instrumentis praestari potest, prius semper est praeferendum.
5. Depressio et discisio lentis per sclerotitcam extractioni praeferri meretur.
6. Omnibus in morbis assimilatio morbose afficitur.

7. Dantur morbi humorum.
8. Lien glandula.
9. Systema plantarum naturale adhucdum non exstat.
10. Mortem semp̄er status pathologicus praecedit.
11. In medicina forensi inter letalitatem absolutam et non absolutam genus medium non est statuendum.
12. Ad vasa deliganda, filum crassum tenuiori est praeferendum.
13. In morbis curandis non semper prima est indicatio, quod morbi causa proxima sit removenda.
14. Datur fluidum nerveum.